

## PINATAWAD NG ISANG AMA ANG KANYANG ANAK

Nagsalaysay si Jesus ng isang kasaysayan:

Madalas na nagsalaysay si Jesus ng maikling kasaysayang tinatawag na talinghaga upang magturo ng katotohanang espirituwal. Narito ang isa:

*"May isang tao na may dalawang anak na lalaki. At sinabi sa kanyang ama ng bunso, 'Ama, ibigay mo sa akin ang bahagi ng iyong kayamananang nauukol sa akin.' At binahagi niya sa kanila ang kanyang pagkabuhay. At hindi nakaraan ang maraming araw, ay tinipong lahat ng anak na bunso ang ganang kanya, at naglakbay sa isang malayong lupain; at doo'y inaksaya ang kanyang kabuhayan sa palunging pamumuhay. At nang magugol na niyang lahat, ay nagkaroon ng isang malaking kagutom sa lupaing yaon; at siya'y nagpasimulang mangailangan."*

*"At pumaroon siya at nakisama sa isa sa mga mamamayan sa lupaing yaon; at sinugo niya siya sa kanyang mga parang, upang magpakain ng mga baboy. At ibig sana niyang mabusog ang kanyang tiyan ng mga ipa na kinakain ng mga baboy; at walang taong magbigay sa kanya. Datapuwa't nang siya'y makapag-isip ay sinabi niya, 'Ilang mga alilang upahan ng aking ama ang may sapat at lumalabis na pagkain, at ako'y narito't namamatay ng gutom: Magtitindig ako at paroroon sa aking ama, at aking sasabihin sa kanya. Ama, nagkasala ako laban sa langit at sa iyong paningin: hindi na ako karapat-dapat na tawaging anak mo; gawin mo akong tulad sa isa sa iyong mga alilang upahan. At siya'y nagtindig, at pumaroon sa kanyang ama."*

*Datapuwa't samantalang nasa malayo pa siya, ay natanawan na siya ng kanyang ama, at nagdalang habag, at tumakbo, at niyakap siya sa leeg, at siya'y hinagkan. At sinabi ng anak sa kanya, 'Ama, nagkasala ako laban sa langit, at sa iyong paningin. Hindi na ako karapat-dapat na tawaging anak mo.' Datapuwa't sinabi ng ama sa kanyang mga alipin, 'Dalhin ninyo ritong madali ang pinakamabuting balabal, at isuot ninyo sa kanya; at lagyan ninyo ng singsing ang kanyang kamay,*

at mga panyapak ang kanyang mga paa: at kunin ninyo ang pinatabang guya, at inyong patayin, at tayo'y magsikain, at mangagkatuwa: Sapagka't patay na ang anak kong ito, at muling nabuhay; siya'y nawala, at nasumpungan.' At sila'y nangagpasimulang mangagkatuwa."

"Nasa bukid nga ang anak niyang panganay: at nang siya'y dumating at malapit sa bahay, narinig niya ang tugtugin at ang sayawan. At pinalapit niya sa kanya ang isa sa mga alipin, at itinanong kung ano kaya ang mga bagay na yaon. At sinabi niya sa kanya, 'dumating ang kapatid mo; at pinatay ng iyong ama ang pinatabang guya dahil sa siya'y tinanggap niya na ligtas at magaling. Datapuwa't nagalit siya, at ayaw pumasok; at lumabas ang kanyang ama, at siya'y namanhik sa kanya. Datapuwa't siya'y sumagot at sinabi sa kanyang ama, Narito, maraming taon nang kita'y pinaglilingkuran, at kailanma'y hindi ako sumuway sa iyong utos; at gayon ma'y hindi mo ako binigyan kailanman ng isang maliliit na kambing, upang ipakipagkatuwa ko sa aking mga kaibigan. Datapuwa't nang dumating itong anak mong umubos ng iyong pagkabuhay sa mga patutot, ay ipinagpatay mo siya ng pinatabang guya."



"At sinabi niya sa kanya, Anak, ikaw ay palaging nasa akin, at iyo ang lahat ng akin. Datapuwa't karapat-dapat mangagkatuwa at mangagsaya tayo: sapagka't patay ang kapatid mong ito, at muling nabuhay; at nawala, at nasumpungan" Lucas 15:11-32.

### Gawin Mo Ito

#### 1. Punan ang mga puwang:

Nagsalaysay si Jesus ng mga \_\_\_\_\_  
upang tulungan ang mga tao na maunawaan  
ang mahahalagang katotohanang \_\_\_\_\_

## Mga Aralin Mula Sa Kasaysayan

May dalawang paraan ng pag-iiwan ng mana: sa pamamagitan ng isang habilin, o sa pamamagitan ng mga kaloob sa mga tagapagmana samantalang nabubuhay pa ang may-ari. Ibig na ibig na ng bunsong anak na lumisan ng tahanan upang matamasa ang buhay na malaya. Ibig niya na siya ang pumili ng magiging kaibigan. Ayaw niya na masabihan ng kanyang ama't kapatid ng dapat gawin. Kaya't ibinigay naman ng ama ang kanyang bahagi sa mana at siya'y lumisan.



Habang may salapi siya, marami siyang mga kaibigan. Nang maubos na ang kanyang salapi, nawala na rin ang "mga kaibigang" ito. Sa wakas, halos mamatay ng

gutom at nainggit sa mga baboy na inalagaan niya, napagkilala niya ang malaking kamangmangang nagawa niya. Nagbalik siya sa kanila na nagsisisi ng kanyang kasalanan, at humihingi ng kapatawaran. Ang inaasahan niya'y bibigyan siya ng kanyang ama ng anumang gawain.

Nguni't gayon na lamang ang pagkamangha niya nang ang dati niyang kalagayan sa pamilya ay ibalik sa kanya. Hindi siya karapat-dapat sa ganitong kabutihan subali't mahal pa rin siya ng kanyang ama sa kabila ng kanyang kasalanan.

Sa talinghagang ito, ang ama'y kumakatawan sa ating Amang nasa Langit -- ang Dios. Ang mga anak ay ang dalawang uri ng mga taong naliligaw. Ang bunso'y ang makasalanang nagsisisi sa kanyang nagawang kasalanan at nagbabalik-loob sa Dios upang humingi ng tawad.

Ang panganay, na nagmamalaking siya'y mabuti at ipinagmamakahiya ang kanyang kapatid na bunso, ay naglingkod nga sa kanyang ama. Nguni't ang pagsasalita niya'y nagbadyang hindi siya talagang umiibig. Sa kaibuturan ng kanyang puso, kasinlayo niya ang kapatid na bunsong nasa ibang lupain.

Kinakatawan niya yaong nagmamalaki na sila'y mabuti at hindi nagugunitang makasalanan din sila na nangangailangan ng kapatawaran ng Dios. Ang kapalaluan, pamimintas, at di-pagpapatawad ay maaaring maging higit na mabigat na kasalanan kaysa nagawa ng bunsong anak sa malayong lupain.

Nasuway nating lahat ang ating Ama sa Langit at nakagawa tayo ng pagkakamali. Hindi tayo karapat-dapat sa Langit. Subali't inaanyayahan Niya tayong lumapit sa Kanya upang magkamit ng kapatawaran.



*"Sapagka't ang kabayaran ng kasalanan ay kamatayan datapuwa't ang kaloob na walang bayad ng Dios ay buhay na walang hanggan kay Cristo Jesus na Panginoon natin" Roma 6:23.*

### Gawin Mo Ito

2. Bakit nilisan ng bunsong anak ang kanilang tahanan?

- \_\_\_\_\_ a) Upang humanap ng magandang hanapbuhay.
- \_\_\_\_\_ b) Upang maglingkod sa sangkatauhan.
- \_\_\_\_\_ c) Upang makapamuhay sa sariling kaparaanan.

3. Bakit siya nagbalik sa kanila?

- \_\_\_\_\_ a) Upang humingi pa ng salapi.
- \_\_\_\_\_ b) Upang humingi ng tawad sa kanyang ama at ng gawain.
- \_\_\_\_\_ c) Upang ibalita sa kanila ang lunsod.

4. Sino ang nangangailangan ng pagpapatawad ng Dios?

- \_\_\_\_\_ a) Lahat, ang lahat ay nagkasala.
- \_\_\_\_\_ b) Yaon lamang masasamang tao.
- \_\_\_\_\_ c) Yaong nakatira sa lunsod.

5. Sauluhin ang Roma 6:23.

6. Nagkasala ka ba? Ibig mo bang ikaw'y patawarin ng Dios? \_\_\_\_\_

## Gawin Mo Ito

7. Sauluhin ito: "Ama... nagkasala ako laban sa Langit... hindi na ako karapat-dapat na tawaging anak Mo." Ang sinabing ito ng anak na bunso'y maaari mong gawing panalangin ngayon. Anuman ang nagawa mo, tatanggapin ka ng Dios sa Langit at patatawarin, sapagka't mahal ka Niya.

## DAPAT TAYONG MAGPATAWAD

Itinuro ni Jesus na kung ibig nating patawarin tayo ng Dios, dapat nating patawarin yaong nagkakasala sa atin. Ang paghihinakit ay kasalanan at ugat ng ibang kasalanan. Nagbubunga ito ng kapaitan, pamimintas, poot, pag-aaway, at pati pagpatay. Hangga't nanghahawak tayo sa ating mga kasalanan ay hindi tayo patatawarin. Bumitiw tayo at bayaang ito'y alisin ng Dios. Sinabi ni Jesus:



*"Kung hindi ninyo ipatawad sa mga tao ang kanilang mga kasalanan, ay hindi rin naman kayo patatawarin ng inyong Ama ng inyong mga kasalanan"*  
Mateo 6:15.

## Gawin Mo Ito

8. May nagkasala ba sa iyo? \_\_\_\_\_ Patulong sa Dios upang ikaw'y makapagpatawad at makalimot.

## SI JESUS AY NAGPAPATAWAD NG MGA KASALANAN

Naparito sa sanlibutan si Jesus sa dalawang kadahilanan:

1. Upang ituro sa atin ang tungkol sa Dios at sa Kanyang pag-ibig.
2. Upang akuin ang ating mga kasalanan at mamatay sa lugar natin nang tayo'y mapatawad.



May karapatang magpatawad si Jesus sa sinumang lumalapit sa Kanya na nagnanais ng kapatawaran, yamang Siya'y namatay para sa lahat ng makasalanan. Maraming makasalanan ang pinatawad

ni Jesus at lubos Niyang binago ang kanilang buhay. Isa sa mga ito'y ang makasalanang babae na nakarinig marahil sa Kanyang pangangaral at ibig ipamalas ang kanyang pasasalamat. Nagtungo siya sa bahay ni Simong nag-anyaya kay Jesus at sa mga alagad upang sa kanila maghapunan. Tumatangis niyang pinagsisihan ang kanyang mga kasalanan sa may paanan ni Jesus. Nabigla si Simon nang makitang pinapayagan ni Jesus na hipuin ng isang babaing makasalanan ang Kanyang mga paa. Ang wika ni Jesus sa kanya:

*"Isang may pautang ay may dalawang may utang sa kanya: at ang isa'y may utang na limandaang denaryo, at ang isa'y limampu. Nang sila'y walang maibayad, ay kapwa pinatawad niya. Alin nga sa kanila ang lalong iibig sa kanya? Sumagot si Simon at sinabi, Inaakala ko na yaong pinatawad niya ng lalong malaki. At sinabi niya sa kanya, Matuwid ang pagkahatol mo. At paglingon sa babae, ay sinabi niya kay Simon, Nakikita mo baga ang babaing ito? Pumasok ako sa iyong bahay, hindi mo ako binigyan ng tubig na ukol sa aking mga paa; datapuwa't dinilig niya ang aking mga paa ng kanyang mga luha, at kinuskos ng kanyang buhok. Hindi mo ako binigyan ng halik: datapuwa't siya, buhat nang ako'y pumasok ay hindi humihinto ng paghalik sa aking mga paa; Hindi mo pinahiran ng langis ang aking ulo: datapuwa't pinahiran niya ng unguento ang aking mga paa. Kaya nga sinasabi ko sa inyo, Ipinatatawad ang kanyang maraming kasalanan: sapagka't siya ay umibig ng malaki: datapuwa't sa pinatatawad ng kaunti, ay kakaunti ang pag-ibig. At sinabi niya sa babae, Ipinatatawad ang iyong mga kasalanan. At ang mga kasalo niyang nangakaupo sa dulang ng pagkain ay nagpasimulang nangasabi sa kanilang sarili, Sino ito, na nagpapatawad pati ng mga kasalanan? At sinabi niya sa babae, Iniligtas ka ng iyong pananampalataya: yumaon kang payapa"*  
Lucas 7:41-50.

Galak na galak ang babae nang siya'y patawarin ni Jesus! Kakamtin din ng Pariseo at ng kanyang mga kaibigan ang kagalakan at kapatawarang ito kung kikilalanin nilang sila'y makasalanan. Sila'y mga palalo at ipinagmamalaki nila ang kanilang mabubuting gawa.



Ang tanong ng mga Pariseo, "Sino ito, na nagpapatawad pati ng mga kasalanan?" Sino ang nagpapatawad ng mga kasalanan? Ang Anak ng Dios -- ang Panginoong Jesucristo. Hanggang ngayo'y patatawarin Niya ang mga lumalapit sa Kanya. Tayo'y dapat magpatirapa sa Kanyang paanan, na kinikilalang tayo'y makasalanan, at pinagsisisihan ang ating mga kasalanan at nagnanais na maalis ito. Sa kaibuturan ng ating puso'y naririnig nating sinasabi Niya, "Pinatatawad ang iyong mga kasalanan. Iniligtas ka ng iyong pananampalataya; yumaon kang mapayapa." Ang pagpapatawad ni Jesus ay naghahatid sa atin ng kagalakan, kapayapaan, at isang bagong buhay.

O maari tayong tumulad sa mga Pariseo at magkunwang hindi tayo makasalanan. Habang ang ganito'y ginagawa natin, hindi tayo tatanggap ng kapatawaran ng ating mga kasalanan. Dapat nating ipahayag ito kay Jesus at ihingi ng tawad. Dapat munang mapatawad ang iyong mga kasalanan bago ka magkaroon ng buhay na walang hanggan.